



宛陵先生文集目錄卷第二十六

李廷老見訪

墨竹

江寧李諫議

寄永叔

送胥裴二子迴

憶桐城山行

和平叔道傍竹

峇裴如晦

夜酌趙侯家

暮雪

西湖對雪

和資政侍郎雪後

王龍圖知江陵

和通判雪後招飲

和資政登看山亭

雪中通判家飲迴

雪後西湖宴集

峇王德言遺柑

劉運使因按拜省 荅通判

元日 通判遺新柳

送孫曼卿鑱應 和劉察院送客迴

不知夢 郊城道中

汝州後池聽水 春鳩

留別汝州王待制 夢覺

汝州 逢牧

寄滁州歐陽永叔 衛州倅趙中舍

王侍郎命賦梅花 荅永叔寄篆字

和荅范天民 樊榷官勸予止酒

和通判雨中 荅水立

和永叔琅琊六詠

目錄終

目錄

宛陵先生文集卷第二十六

李廷老自蔡州見訪云明日便歸鄭

故人夜相過秉燭爲開席車馬立在門樽酒豈暇
索賸賸別後言忽忽恨將適旣去暝色合不可見
行跡

墨竹

許有盧娘能畫竹重抹細拖神且速如將石上蕭
蕭枝生向筆間天意足戰葉斜尖點映間透勢虛
粘斷還續粉節中心豈可知淡墨分明在君目

江寧李諫議

滄江石頭下
汙汙瀉天東
寒潮日夕至
不與廢興同
陛下始封地
氣象常鬱鬱
葱六代有舊跡
物景付與公
切莫負山水
可追王謝風

方在許昌幕內弟滁州謝判官有書邀余
詩送近聞歐陽永叔移守此郡爲我寄聲
也

從事滁陽去
寄音苦求詩
吾詩固少愛
唯爾太守知
不敢輒所拒
勉勉作此辭
山城本寂寞
物色同淮夷
淮俗舊輕僇
未識遠博宜
無將麟在郊
便欲等文狸
爾去事太守
當矯庸庸爲
伊人道義富
嘗立天子墀
我輩在蟻垤
難謂太華卑
又若游蹄涔
安見滄海涯
况於爾實親
告爾爾勿疑

送胥裴二子迴馬上作

陰陰雪雲低
游子去將懶
豈唯游子倦
疲馬行亦歎
送罷我獨還
迴看鴈爲伴
念此日暮時
寂寞閉竹館

初冬夜坐憶桐城山行

我昔吏桐鄉
窮山使屢躡
路險獨後來
心危常自怯
下顧雲容容
前溪未可涉
半崖風颭然
驚鳥爭隨葉
修蔓不知名
丹竇圻在茨
林端野鼠飛
綠挽

一何捷馬行聞虎氣豎耳鼻息歛遂投山家宿駭
汗衣尚浹歸來撫童僕前事語妻妾吾妻常有言
艱勤壯時業安慕終日聞咲媚看婦靨自是甘勞
力于今無所懾老大官雖暇失偶淚滿睫書之空
自知城上鼓三疊

和平叔道傍竹

野田有脩竹叢踈飽於霜下上之佳禽左右雜枯
桑豈無行路子行路馱榛荒忽見此翠色徘徊未
能忘車馬去何疾迴顧隔山崗

荅裴如晦

懷我歌我辭乃知行子倦音雖彼妙發想若此可
見歌竟夜燈青野窻鳴濕霰散髣髴聞孤鴻飛急應
有羨

夜酌趙侯家聞合流曹光道詣府遂訪之
一夕縱談明日光道赴本任邀余詩送因
叙其言以贈焉

方與舊將飲談兵燈燭前聞有故交至心喜輒論
邊跨馬踏明月往見覽留連且共語出處子懷予
久然男兒太平時功業未可先故當守詩書道義
躋古賢苟復不得用卷以放林泉吾蘊誠若此奈

何貧所纏仕宦偶同郡文字可以傳行行志茲語
聊用樂永年

暮雪

暮雪止復落暗積如避人平明視庭中物物各已
新草木一變妍枯槁忘其真隨風來無迹高下得
以均采薇歌卒章霏霏霑車輪今豈無是作勞苦
不足陳

西湖對雪

獨玩湖中雪移舟水凍灣寒塘起孤鴈危樹失前
山著物偏能積衝風不礙還無慙子猷興都盡剡

溪間

依韻和資政侍郎雪後書事

風旗冷落偏欺酒衆樹芳菲欲並梅人意不知南
畝望只驚鴻鴈向川來

王龍圖知江陵

捧詔出荊州天心寄遠憂行車踐殘雪寒色犯輕
裘祖轍山川闊歌驪道路愁吏迎多越乘兵衛粲
吳鉤地與蠻溪接江通溪水流風宜橘林賦俗尚
竹枝謳樽俎思疇日煙雲感舊游終當勞侍從寧
久渚宮留

依韻和通判太博雪後招飲一首

雪晴何所樂樂趣在杯中况復君家美雕盤膾縷

紅

邀飲奏醴醪案杯烹蟹螯吾非獨醒者莫誦楚人

騷

依韻和資政侍郎雪後登看山亭

湖上晴煙凍未收湖中佳景可遲留更臨危樹看
群岫雪色嵐光向酒浮

雪中通判家飲迴

時一卒彈胡琴

朔風聲滿枯桑枝陰雲不定蛟龍歸凍禽聚立高

樹時密雪萬里增寒威訪君留連舉酒卮胡琴奏
罷歡已微小駒跨去沒四蹄飄花凌亂霰人衣醉
目遠望天地迷何暇更問孤鴻飛茅屋豈無單且
飢平明共賀麥壠肥

雪後資政侍郎西湖宴集偶書

潭心不凍處鴈鷺自相依積雪正無際因風忽起
飛初驚如避弋復下信忘機偶得從公飲聊書此
景歸

近有謝師厚寄襄陽柑子乃吳人所謂綠
橘耳今王德言遺姑蘇者十枚此真物也

因以詩答

荊州持大橘亦自名黃柑忽得洞庭美氣味何可
參遂生吳洲思恨不羽翼南

運使劉察院因按歷歸西京拜省

在昔志四海所遇非一途朝以言悟主夕即被金
朱于茲亦未幾用直升雲衢臺分東西屬御史從
子除天馬日千里豈並局促駒朔北遏亂萌褒嘉
賜璽書乃衣漢使繡威譽傾國都借問世上榮萬
國與此殊明朝歸洛陽聊且餞高車亭埃况非遠
春郊無疾驅

余之親家有女子能點酥爲詩并花果麟
鳳等物一皆妙絕其家持以爲歲日辛盤
之助余喪偶兒女服未除不作歲因轉贈
通判通判有詩見答故走筆酬之

翦竹纏金大於掌紅縷龜紋挑作網瓊酥點出探
春詩玉刻小書題在榜名花雜果能眩真祥獸珍
禽得非廣礪落男兒不足爲女工餘思聊可賞

元日

昔遇風雪時孤舟泊吳埭江潮未應浦盡室坐相
對行庖得海物醎酸何瑣碎久作北州人食此欣

已再是時值新歲慶拜乃唯內草率具盤餐約略
施粉黛舉杯更獻酬各爾祝鮐背咀橘齒病酸目
已驚老態豈意未幾年中路苦失配嘉辰衆所喜
悲淚我何耐曩歡今已哀日月不可賴前視四十
春空期此身在世事都歇聞讀書未忍退過目雖
已忘寧捨心久愛何當往京口竹里翦荒穢行歌
樂暮節薪菽甘自刈

通判遺新柳

園柳發新萸官居雪尚壅君喜持報春衰意非舊
勇芳菲即可挿予髮慙種種

送孫曼卿鑱廳赴舉

舊果豈非好截樹接新枝欲變明年花曾不根本
移屈彼自然性曰茲山木卑子才寶艷富久爲人
所推固當升高科我送作此詩

依韻和劉察院送客迴過湙水馬上有作
車騎踏春堤脩然思如濯望驄人自避解凍魚方
樂挈流古樹根跨岸枯薪約煙雲淡淡天嫩綠生
叢薄

不知夢

夢中不知夢但謂平常時相與共笑言焉問久別

離有贈若有得及覺已失之人生在世間何異夢
寐為

郟城道中

行行溪水邊鏡碧不可唾安知有沫流草木多偃
卧潭鳥瞥復沒灘沙淨如簸不獨荊州民居險頸
瘦大

汝州後池聽水

春水泉脉動分崑臨澗源津津出石齒泠泠紫竹
根猶和野雲翠復落郡池喧心靜意自適不知朝
市煩

春鳩

鳴鳩識陰晦聒聒雌逐雄鵲巢汝得共可蔽雨與
風春物况不晚杏萼已半紅試看池館間燕雀隨
西東

留別汝守王待制仲儀

來時柳未芽去見杏吐萼相歡無幾日節候已非
昨邂逅二十年三遇三睽索會合信難常焉用計
踈數

夢覺

夕夢多夢之覺來遂成憶憶子生平時事往無一

得信若此夢寐豈不見顏色復存來告言言虛音
匪默是覺曷爲真覺夢可以感

汝州

主人少聽我爲言風土殊美哉面有顙生此頸若
壺噫號無冬夏歲禱無嗟吁只怜郡池上不異山
林居

逢牧

國馬一何多來牧郊甸初大群幾百雜小群數十
驅或聚如鬪蟻或散如驚鳥或踐麥無根或齧樹
無膚牧卒殊不顧抱鞭人民墟欲酒與之飲欲食
與之饋日暮卒醉飽枕鞭當路隅茫茫非其土誰
念有官租

寄滁州歐陽永叔

昔讀韋公集固多滁州詞爛熳寫風土下上窮幽
竒君今得此郡名與前人馳君才比江海浩浩觀
無涯下筆猶高帆十幅美滿吹一舉一千里只在頃
刻時尋常行舟艫傍岸撐牽疲有才苟如此但
恨不勇爲仲尼著春秋貶骨常苦咎後世各有史
善惡亦不遺君能切體類鏡照媠與施直辭鬼膽
懼微文姦魄悲不書兒女書不作風月詩唯存先

王法好醜無使疑安求一時譽當期千載知此外
有甘脆可以奉親慈山蔬采笋蕨野膳獵麇麋
鱸膾古來美臯彘今且推夏果亦瑣細一舊頗窺
圓尖剥水實青紅摘林枝又足供宴樂聊與子所
宜慎勿思北來我言非狂癡洗慮當以淨洗垢當
以脂此語同飲食遠寄入君脾

衛州通判趙中舍

我久在河內頗知衛風俗沙田多種稻野飯殊脫
粟况聞別乘至佇望大河曲飲罷何以贈柔條路
傍綠

資政王侍郎命賦梅花用芳字

許都二月杏初盛公府後園梅亦芳因思江南花
最早開時不避雪與霜主人惜春春未晚遂命官
屬携壺觴酒行守吏摘花至素艷紫萼繁於裝天
桃穠李不可比又况無此清淡香豈辭盡醉對顏
色頻嗅競粘鬚藥黃何時結子助調鼎我心舊職
不敢忘

歐陽叔寄琅琊山李陽冰篆十八字并

求叔詩一首欲予繼作因成十四韻奉
我坐許昌塵土中山翠泉聲遠眼耳公雖被謫守

滁陽日少郡事窮山水東南有風西北來忽得書
詩連數紙并寄陽冰古篆字字形矯矯龍蛇起其
文乃只題姓名大曆六年春氣尾報云此篆無人
知野僧好事爲公指公留崑下久徘徊公剔莓苔
汲泉洗點畫雖然未苦訛霜侵風剝多皴理公疑
鳥迹踏蒼崖山祇愛惜將有以雲藏至今不近俗
月伴古源清且泚此石公知石不知公與前人定
知已墨模幾幅許傳玩譬言於玦玉終可喜况復爲
詩刻其下句奇字峻驚山鬼何當少得從公游爲
公揮筆寧非美

依韻答范天民

古今冠佩立朝人多作北山松下塵我愛蟠桃種
來久開花結子不由春

樊推官勸予止酒

少年好飲酒飲酒人少過今旣齒髮衰好飲飲不
多每飲輒嘔泄安得六府和朝醒頭不舉屋室如
盤渦取樂反得病衛生理則郝予欲從此止但畏
人譏訶樊子亦能勸苦口無所阿乃知止爲是不
止將如何

依韻和通判二月十五日雨中

仲春月既望物候恰分中窻聽五更雨花開前日
風詩成止酒後病怯舉杯空短髮雖然黑心如一
老翁

感春之際以病止酒水丘有簡云時雨乍
晴物景鮮麗疑其未是止酒時因成短章

奉荅

東風固無迹何處見春歸土逐草心圻雨兼花片
飛雖怜柔甲長只恐艷條稀君但惜晴景休言止
酒非

和求叔琅琊山六詠

歸雲洞

洞深豈不有神物朝朝但見雲飛還雲收雨歇草
樹濕澗下流水空潺潺

琅琊溪

枯藤垂溪冰已消溪水濺濺石間亂潭靜鳥呼人
渡時鳥驚人語來還散

班春亭

林下鳩鳴圻晴杏田間水漫春溶溶使君固自足
風美時傍青山去問農

庶子泉

沙坑石竇無限泉此泉緣底名不滅庶子去來多
少年依舊清心共泉潔

石屏路

尋常畫屏多畫山何意此山還作屏峭排直上
幾千尺下有石路莓苔青

惠覺見方丈

松門隱者我未識一見君詩如已爽歲月任隨人
事遷此身不動雲生壁

宛陵先生文集卷第二十六

宛陵先生文集目錄卷第二十七

答宋學士寄紙

二月雨後有蚊蚋

春寒

答三韓見贈述詩

叙答三韓簡

過頴橋懷永叔

樵澗書畫夢

靈樹鋪夕夢

謝王汝州勸復飲

陪王待制觀牡丹

和王待制牡丹詠

洛陽牡丹

等慈寺望嵩高岳

睡意

三月十四日汝州夢

再別仲儀

夕發陽翟

缺月

道次靈井

谷江十鄰幾

喜謝師厚及第

谷通判惠庭花

水丘遺魚

和鄰幾見寄

雀奪燕巢

和永林啼鳥

和永林桐花

和王仲儀詠癭

憶吳松江晚泊

寄丑師魯

夏日寄韓仲文

憶將渡揚子江

秀叔頭虱虱

稚子獲雀雛

丙戌五月晝夢

蜜

谷王德言

夢覩

悲書

寄曹光道惠李

深夏尚見奈樹有實

戲谷仲文惠海味

寄光化退居李晉卿

次酬江隣幾

戲謝魏文惠薏苡

目錄終

死陵先生文集卷第二十七

荅宋學士次道寄澄心堂紙百幅

寒溪浸楮春夜月敲冰舉簾勻割脂焙乾堅滑若
鋪玉一幅百錢曾不疑江南老人有在者爲予嘗
說江南時李主用以藏祕府外人取次不得窺城
破猶存數千幅致入本朝誰謂奇漫堆閣屋任塵
土七十年來人不知而今製作已輕薄比於古紙
誠堪嗤古紙精光肉理厚適歲好事亦稍推五六
年前吾永叙贈予兩軸今寶之是時頗叙此本未
遂號澄心堂紙詩我不善書心每愧君又何此百

幅遺重增吾報不敢拒且置縑箱何所爲

二月雨後有蚊蚋

春夜一二蚊蚋飛久不見之尚可喜而今稍喧來
聒人向後更暖奈爾輩

春寒

春晝自陰陰雲容薄更深蝶寒方歛翅花冷不開
心亞樹青帘動依山片雨臨未嘗辜景物多病不
能尋

荅韓三子華韓五持國韓六玉汝見贈述詩

聖人於詩言魯不專其中因事有所激因物興以

通自下而磨上是之謂國風雅章及頌篇刺美亦
道同不獨識鳥獸而爲文字二屈原作離騷自哀
其志窮憤世嫉邪意寄在草木蟲邇來道頗喪有
作皆言空煙雲寫形象詭卉詠青紅人事極諛諂
引古稱辨雄經營唯切偶榮利因被蒙遂使世上
人只曰一藝克以巧比戲弈以聲喻鳴桐嗟嗟一
何陋甘用無言終然古有登歌緣辭合徵宮辭由
士大夫不出於瞽矇予言與時輩難用猶篤瘡雖
唱誰能聽所遇輒瘖聾諸君前有贈愛我言過豐
君家好兄弟響合如笙叢蟬欲一一報強說恐非

夷聊書類頑石不敢事磨礱

前以詩荅韓三子華後得其簡因叙下情前者報君詩妄說良有以昔予在京師多爲人所詆短章然無工實未甘藝此因君有過褒聊且發憤排何言敢爲師乃是貴不躋平常遭口語攢集猶毒矢此論苟一出是非必蜂起偶爾道瘖聾多疑已竊指雖恃不欺衷恨未致速死安得二頃田歸耕曷爲耻誰能事州郡鷄狗徒聒耳

過潁橋懷永升

昔送之官東郡時夜闌對酒風揭屋君今淮海予

再過古驛依依老槐綠

榭澗晝夢

誰謂死無知每出輒來夢豈其憂在途似亦會相送初看不異昔及寤始悲痛人間轉面非清覓歿猶共

靈樹鋪夕夢

晝夢同坐偶夕夢立我左自置五色絲色透縑囊過意在留補綴恐衣或綻破歿仍憂我身使存心得墮

汝州王待制以長篇勸予復飲酒因謝之

前因飲酒多乃苦傷營衛嘔血踰數升幾不成病
肺上念父母老下念妻兒稚不死常抱病於身寧
自貴樊子來勸我止飲良有謂公復遺我詩責我
詞甚毅指以羊齒衰非酒何養氣春飲景可樂夏
飲暑可避秋飲心志愁冬飲暖勝被醉歌人不恠
醉言人不忌在酒功實多止酒酒何罪假如壽九
十今子已半世不飲徒自苦未必止爲利胡汨妄
與真恐乖達者意屈原吟澤畔方悟獨醒累子居
今之時安免人病議是以告子勤子守亦謬計我
讀纔一過不覺顏起愧自茲願少飲但不使疾熾

書此以謝公公言誠有味

陪王待制清涼院觀牡丹賦詩

公言牡丹盛未覩古人詩品衆自爭貴葉多方見
奇名因他姓著色爲別根移華髮我何感洛陽年
少時

和王待制牡丹詠

誰移洛川花一日來汝海濃淡百般開風露幾番
改傍欄人自醉惜翦春有待使君方少年共賞喜
我在

洛陽牡丹

古來多貴色歿去定何歸清鬼不應散艷花還所
依紅樓金谷妓黃值洛川妃朱紫亦皆附可言人
世稀

汝州等慈寺閣望嵩岳

崢嶸古寺閣蒼山挿晴簷少室出天外巍巍何甚
嚴王都在其下風露國所霑日暮飛雲歸已失中
頂尖

睡意

少時好睡常不足上事親尊日拘束夜吟朝誦無
暫休目齒生瘡臂銷肉今踰四十無所聞又况喪
妻仍獨宿虛堂淨掃焚清香安寢都忘世間欲花
時啼鳥不妨喧清暑北窓聊避燠葉落夜雨聲滿
堦雪下曉寒低墜屋四時自得興味佳豈必鏘金
與鳴玉萬事易狀此不狀真可養恬無天促且夢
莊周化蝴蝶焉顧仲尼譏朽木人事幾不如夢中
休用區區走榮祿

三月十四日汝州夢

我歸十九年飲不負升斗昨夕夢見之謂須多置
酒雖慰鬼來言定不復入口俟當返吾廬且爲貯
罌缶夢寐何敢欺從笑愚所守

再別仲儀

前別歲月遠道同情相親三旬忽相見愈厚不厭
頻昔云思數面今無愧古人嗟然東去懷紛若陌
上塵

夕發陽翟

我行陽翟道暮雨原上急麒麟家相望霹靂碑下
立農耕傍山去鬼火迸林入莫問泉下人馬墮衣
更濕

缺月

缺月來照屋角時西家狗吠東家疑夜深精靈鬼
物動憊宰古莽無風吹

道次靈井

井面水不動傍分龍鱗激泉氣時生漚上湧光的
皦深苔翠堪染石底清可覲旱歲或來祠彈絃屬
靈現

荅江十鄰幾

蔡州雖非邀作書素所懶春風領燕來得君詞款
款燕迴須在秋此報莫言緩何日見嵇康重彈廣
陵散

喜謝師厚及第

時第一甲二十八人
名在二十三

宿雨洗新綠朝日初聞鶯風從天門來吹下玉簡
名列星二十八經緯何縱橫南方朱鳥日光焰今
人驚其餘撒沙衆龜鼈瓜瓠明吾欣安石後世世
有令聲

孟夏二日通判太傅惠庭花二十枝云是
手植因以爲荅

前日已春盡夏卉抽嫩青唯君所植花餘紅猶滿
庭常惜畏景逼贈未及飄零欲挿爲之醉但慙髮
星星

水丘於西湖得活鯽魚三尾見遺余頃在

襄城獲數尾時歐陽永叔方自乾德移滑
臺留待其至且有詩後居京師蔡仲謀者
亦有以贈乃思襄時所留復有詩於今三
得三詠之矣

襄城得圓鯽留以待吾友大梁又得之始憶終按
酒今君復持贈重念滁陽守滁陽石瀨中此物豈
無有三得實嘉遺我敢自私口口且不爭甘事亦
難利誘

和江鄰幾見寄

自此許州起慶曆
六年夏盡其年終

清風當晝起吹我庭下槐軒軒枝上葉碎影亂綠

苔左右無人聲時有啼禽來啼禽感所懷其音一
何哀思歸無曉夕血滴山榴開曰予當是時爲之
腸九迴江子方謫官復有擬古才遠寄平淡辭曷
報瓊與瓌

雀奪燕巢生四雛

去年燕營巢銜泥入我廬秋歸春復來橫被雀所
居翩然去不較義者欲與除毀覆必傷卵愛彼此
何踈乃竦長黃口逐之寧曰紆果得生四雛卉色
頭戢如後當還燕巢穿屋不害余

和歐陽永叔啼鳥十八韻

南方窮山多野鳥百種巧口乘春鳴深林參天不
見日滿壑呼嘯誰識名但依音響得其字因與尔
雅殊形聲我昔曾有禽言詩粗究一二啼喙情若
竹岡頭泥滑滑君時最賞趣向精餘篇亦各有思
致恨未與盡衆鳥評君今山郡日無事靜聽鳥語
如交爭提壺相與來勸飲戴勝亦助能勸耕我念
此鳥頗有益如欲使君勤以行勸耕幸且強職事
勸飲亦莫無獨醒杜鵑蜀魄哭歸去小人懷土慎
勿聽城頭春鳩自謂拙鵲巢輒處安得平高巢奮
木羨毛羽哢吭葉底無如鶯口中調簧定何益下

啄蚯蚓孰曰清自餘多類不足數一一推本煩神
靈我居中土別無鳥老鴉鸚鵡方縱橫教雛叫噪
日群集豈有勸酒花下傾願君切莫厭啼鳥啼鳥
於君無所營

和永叔桐花十四韻

湛湛碧井水其上有梧桐春隨井氣生白花飛濛
濛曉枝滴甘露味落寒泉中結實待瑞羽歲晚半
枯空桐既無鳳凰井豈潛蛟龍乃知至神物未易
令人逢當時集潁川偶值黃次公次公入爲相此
鳥曷不從遂使神鷗雀竟用竒怪窮我言非毀古
欲遵平直蹤我願二千石但使德化隆有桐鳳不
來於桐無愧容有鳳政不舉於鳳何爲崇若君桐
華篇聊以發我衷

和王仲儀詠癭二十韻

汝水出山隙汝民多病癭或如鷄精滿或若猿嗛
並女軀心高掩襟男大潤裁領飲水擬注壺吐詞侔
有鯁樗里旣已聞杜預亦不幸秦人號智囊吳歆
繫狗頸臙赬常住願衿行安及脛只欲仰問天無
由俯窺井挾帶歲月深冒犯風霜冷狀惡雖自知
剖割且誰肯不唯羞把鏡仍亦愁弔影內療煩羊

曆外破費針穎在水曰楠榴剝之可爲皿此誠無
所用既有何能辟音屏臄臄則無首臄腫異臄頂難
將面目施可與胎胞逢賢哉臨汝守世德調金鼎
氓俗雖醜乖教今日脩整風土恐隨遷晨昏真愛屢
省儻欲便慈顏名城不難請

憶吳松江晚泊

念昔西歸時晚泊吳江口回堤溯清風淡月生古
柳夕鳥獨遠來漁舟猶在後當時誰與同涕憶泉
下婦

使者自隨州來知尹師魯寓止僧舍語其

處物景甚詳因作詩以寄焉

驛使話漢東故人遷謫處所居雖非居有樹即嘉
樹日膳或雞狔時蔬多筍芋夜堂虵結蟠晝戶鵲
噪聚著書今未成愛靜已得趣予欲訪其人炎蒸
未能去

夏日對雨偶成寄韓仲文昆弟

日日城頭雨還添湖上波窓中人自聽門外潦應
多不畏車生耳唯愁麥化蛾吾廬無所有頻看壁
間梭

憶將渡楊子江

月暈知天風舟人夜相語平明好挂帆白浪須出
浦此身猶在吳歸夢預到楚今日念同來吾妻已
爲土

秀叔頭虱

吾兒久失恃髮括仍少櫛曾誰具湯沐正爾多蟻
虱變黑居其元懷絮宅非吉蒸如蟻亂緣聚若蚕
初出鬢搔劇蓬葆何暇嗜梨栗翦除誠未難所惡
累形質

稚子獲雀雛

屋頭小雀雛氣力苦未長乘暄學調羽忽掛蜘蛛

網其母不能救啁啾空下上乃爲人所探不是蟲
絲枉

丙戌五月二十二日晝寢夢亡妻謝氏同
在江上早行忽逢岸次大山遂往遊陟予
賦百餘言述所覩物狀及寤尚記句有共
登雲母山不得同宮處倣像夢中意續以
成篇

晝夢與予行早發江上渚共登雲母山不得同宮
處何嗟不同宮似所馱途旅樹杪俯烏巢圻穀方
仰乳雉雌更守林號噪見飛鼠鼠驚鷺豎毛怒梟枝

如發弩逡巡吼風雲遠望射岳雨東南橫虹霓萬
壑水噴吐下尋歸路迷欲暮各愁語忽覺晷已非
空庭日方午

蜜

燕啣芥根泥蜂掇花上並帶雨兩股飛所取日能
幾調和露與英澁甘滑於髓天寒百蟲螫割房霜
在匕燕已成鷄歸蜂憂凍餒死乃見萬物心多爲
造化使

王德言自後圃來問疾且曰圃甚蕪何不
治因答

幾日不行圃野草過人頭客怪苦荒穢誰與持鋤
鉤雖然自憐難抱疴方告休即當秋風高掃穽將
遲遊

夢觀

閉目光不揚夢觀良亦審既非由目光所見定何
稟白日杳無朕冥遇嘗在寢此恨不可窮悲淚空
流枕

悲書

悲愁快於刀內割肝腸痛有在皆舊物唯爾與此
共衣裳昔所製篋笥悉更弄朝夕拜空位繪寫恨

少動雖死情難遷合姓義已重吾身行將衰同穴
詩可誦

合流曹光道惠鉅李知其炎酷中有此味
味亦可樂也輒以詩寄

穎傍成蹊李其實小於拳誰知斂枝瘦生此紺玉
鮮摘以筠梢籠沉以石根泉濛濛粉未落粲粲葉
猶連蔭樹咀甘液安有苦熱煎報君惜茲樂時詠
逍遙篇

深夏忽見奈樹上猶存一顆實

累累後堂奈落盡風雨枝行樂偶散步倚杖聊縱
窺林葉隱孤實山鳥曾未知物亦以晦存悟茲身
世爲

病癱在告韓仲文贈烏賊醬生醅醬蛤蜊
醬因筆戲答

我嘗爲吳客家亦有吳婢忽驚韓夫子來遺越鄉
味與官官不識問儂儂不記雖然苦病癱饒叻未
能忌

寄光化退居李晉卿

久無歸田人今喜子去祿移家漢水濱日見漢水
綠川鱗可爲甗山毛可爲藪竟歲馱往還行堤樂

風俗青巾舩上卽漆鬢顏如玉倚檣臨落照獨唱
江南曲聽若在江南歡然自爲足我心雖有羨未
遂平生欲更期畢婚嫁方可事幽麓買山須買泉
種樹須種竹泉以濯吾纓竹以慕賢躅此志應不
忘他時同隱錄

汝南江鄰幾云卽南並淮浮光山有張隱
居種松檜於其上養母甚孝時有猛獸馴
庭中又郡西麻田山土沃泉美久不墾有
劉叟者闢而居之近董氏黃氏欲買土爲
鄰故江有慕之之作子輒次其韻

峩峩淮山上中有隱者棲不知松檜下但見虎豹
蹊人群固已遠樵客入猶迷且奉采蘭養應無抱
玉啼麻田異麻源石路春無泥高士不近俗更在
西嶺西石泉飲自足深壑無人躋不學淮南王安
問犬與雞二人逍遙性所樂唯杖藜復有來慕鄰
他年寧谷嵇願君且勉職聖世未易睽
魏文以予病渴贈薏苡二叢植庭下走筆

戲謝

媿無相如才偶病相如渴溪水有文人薏苡分
菱爲飲可扶衰餘生幸且活安知惡已者不願變

野葛

宛陵先生文集卷第二十七



